



Mette Arqe-Hammeken
Inatsisartunut ilaasortaq, Naleraq

Ivigaasanik arsaattarfiit pillugit § 37 nr. 166/2026 naapertorlugu apeqqummut akissut

19-08-2026
Suliap normua
All. nr. 26747842

Asasara Mette Arqe-Hammeken

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Inatsisartut suleriaasiat naapertorlugu apeqqutitut saqqummiussannut qujanaq. Apeqqutit tullinnguuttuni akissuteqarfigissavakka.

Apeqqut 1: Naalakkersuisut Sisimiuni arsaattarfinnut tunngatillugu pissutsit maanna atuuttut ilisimavaat, matumani illoqarfik maannakkut naammaginartumik tamakkiisumillu atorneqarsinnaasumik arsaattarfimmik peqannginnera ilanngullugu?

Akissut: Sisimiuni arsaattarfiup ivigaasanik qallikkap maniinnera tamatumalu kingunerisaanik ajutoorfiusinnaanera aarleqqutigineqarmat peerneqarnissaanik Qeqqata Kommuniata aalajangersimanera Naalakkersuisut arajutsisimanngilaat. Nutaamik arsaattarfittaartoqarnissaata tungaanut isikkamik arsaattarfik sioqqanik qalligaaq atorneqartassaaq.

Apeqqut 2: Naalakkersuisut imaluunniit Naalakkersuisoqarfik attuumassuteqartoq 2025-miit Sisimiuni arsaattarfiit pillugit borgmesterimik, Qeqqata Kommunanik imaluunniit kommunimi oqartussanik allanik oqaloqateqarsimappat?

a. Aappiuppat, taava oqaloqatigiinnerit suut pillugit ingerlanneqarsimappat, aammalu qanoq tigussaasunik inerneqarsimappat?

Akissut: Sisimiuni arsaattarfeqarnermut tunngasut Ilinniartitaanermut, Kultureqarnermut, Timersornermut Ilageeqarnermullu Naalakkersuisumit aamma Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmit borgmesteri aamma kommunimi oqartussat allat 2025-miilli oqaloqateqarnikuunngillat.

Apeqqut 3: Naalakkersuisut Qeqqata Kommunian Sisimiuni arsaattarfimmik nutaamik pilersitsinissamik pilersaarutai, matumani kommunip 20 mio. koruuninik immikkoortitsinera ilanngullugu, ilisimavaat, aammalu Naalakkersuisut suliniutip maanna killiffia qanoq nalilerpaat?

Akissut: Sisimiuni nutaamik arsaattarfiliornissamik pilersaarut pillugu Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

ilisimatitsissummik tigusaqarnikuunngilaq, matumani kommunip 20 mio. kr.-inik aningaasaliissuteqarniarnera ilanngullugu. Taamaattumik suliniutip massakkut killiffianik Naalakkersuisut nalilersuisinnaanissaminnut naammattumik tunngavissaqanngillat. Tassungali tunngatillugu oqaatigineqassaaq, Timersorneq timigissarnerlu pillugit Inatsisartut inatsisaanni 6. juni 2016-imeersumi § 16 naapertorlugu arsaattarfiliortiternerit kommuninit akisussaaffigineqarmata.

Apeqqu 4: Naalakkersuisut Kalaallit Arsaattartut Kattuffiat (KAK), Kalaallit Nunaanni Timersoqatigiit Kattuffiat (GIF) imaluunniit timersornermut kattuffiit allat attuumassuteqartut Sisimiuni arsaannermut atugassarititaasut pillugit aammalu arsaattarfimmik nutaamik imaluunniit matoqqasumik pilersitsinissamut periarfissat pillugit oqaloqatiginikuuaat?

Akissut: Kalaallit Arsaattartut Kattuffiata (KAK)-p Kalaallit Nunaanni arsaattarfimmik qulisamik pilersitsinissamik, "Air Dome"-mik taaneqartartumik, suliniutaa pillugu llinniartitaanermut, Kultureqarnermut, Timersornermut Ilageeqarnermullu Naalakkersuisup kattuffik oqaloqatigisimavaa. Illoqarfinni arlalinni, taama ittunik atugassaqaartitsilluni pilersitsinissamut periarfissat ilaatigut eqqartorput, Sisimiut ilanngullugit.

Apeqqu 5: Naalakkersuisut Sisimiuni arsaattarfinnik naammaginartunik pilersitsinermut imaluunniit iluarsartuusseqqinnermut peqataarusuppat, assersuutigalugu aningaasaleeqataassuteqarnikkut, aningaasaateqarfinnit imaluunniit aningaasaliissutinut periarfissatigut, teknikkikkut ikiuunnikkut imaluunniit Namminersorlutik Oqartussat, Qeqqata Kommuniata timersornermullu kattuffiit akornanni suleqatigiinnikkut?

Akissut: Naalakkersuisunit aningaasatigut tapiissuteqartoqassappat, Aningaasanut inatsimmi siunertamut tassunga aningaasanik immikkoortitsisoqarsimanissaanik tamanna piumasaqaatitaqartarpoq. Arsaattarfiit atugassarititaannik pilersitsiortornissamut imaluunniit iluarsartuusinnissamut 2026-mut aningaasanut inatsimmi aningaasanik immikkoortitsisoqarnikuunngilaq.

Ilutigalugu erseqqissaatigineqassaaq Timersorneq timigissarnerlu pillugit inatsisartut inatsisaani nr. 15, 6. juni 2016-imeersumi § 14 naapertorlugu nuna tamakkerlugu nunallu immikkoortuini timersortarfinnut Naalakkersuisut pingaarnertut tapiissuteqarsinnaasartut.

Apeqqu 6: Sisimiup angissusaa eqqarsaatigalugu illoqarfik aaqqissuussamik arsaannermut aammalu tamanut timersornermut naammaginartunik atugassaqaartitsinnginnera, pingaartumik meeqqat inuusuttullu kiisalu peqatigiiffilerinermut, timersornikkut, inooqatigiinnikkut peqqissutsikkullu qanoq kinguneqarsinnaasoq Naalakkersuisut qanoq nalilerpaat?

Akissut: Paasissutissat Qeqqata Kommuniata tamanut saqqummiussimasai naapertorlugit, arsaattarfik suli atorneqarsinnaavoq, naak qangatut ileqqoq malillugu sioqqanik qallikkamiikkaluatoq. Meeqqat inuusuttullu atuisullu allat taamaattumik kommunip arsaattarfiup ivigaasaaqqanik taarsiinissaata tungaanut isikkamik arsaanissaminnut suli periarfissaqartinneqarput.

Atortut tassalu pitsaassusaat nalinginnaasumillu atugassarititaasut, atuisut misigisartagaannut, ilorrisimaarnerinut aamma timersornermi peqataanernut sunniuteqarsinnaasarneri Naalakkersuisunit aamma arajutsisimaneqanngillat.

Apeqquut 7: Sisimiut piffissamut naleqquttunik arsaattarfinnik peqalernissaa anguniarlugu Naalakkersuisut qanoq tigussaasunik suliniuteqassamaarpat, aammalu Naalakkersuisut peqataanissaannut piffissaliussamik aalajangersimasumik Naalakkersuisut saqqummiussisinnaappat?

Akissut: § 37 naapertorlugu apeqquut saqqummiunneqarnerani paasissutissat saqqummiunneqartut aamma Qeqqata Kommuniata nammineerluni tamanut saqqummiussai naapertorlugit arsaattarfik ivigaasaaqqanik qallersugaq aserfallassimaqisoq taarsersorlugu sulineq aallartinneqareersimavoq aamma siunertamut aningaasanik immikkoortitsisoqareersimavoq.

Apeqquutit nr. 3-p aamma 5-p akissutaanni soorlu allanneqareersoq najukkani timersortarfinni atugassarititaasut sanaartorneqarneri kommuninit akisussaaffigineqarput, aamma Sisimiuni isikkamik arsaattarfik pillugu ikioqqusissummik Naalakkersuisut tigusaqarsimanngillat.

Taamaattoarli KAK-ip isikkamik arsaattarfimmik Air Domes-imik pilersitsiniarluni suliniuteqarnera, siunissami isikkamik arsaanermi atugassarititaasunik siunissami pitsanngorsaaqataasinnaasoq, tapersersortuassavara.

Inussiarnersumik inuulluaqqusilluta



Nivi Olsen